

boenda
FERÐIR

GARDAVATN & FENEYJAR



24. september – 3. október 2026
Fararstjórn: Marianne Eiríksson

Haut 3
Ítalía | Austurríki | Þýskaland

Ferðalýsing

Gardavatn hefur verið einn vinsælasti áfangastaður Íslendinga til margra ára, enda meðal allra fegurstu staða á Ítalíu. Sjálfur Goethe líkti staðnum við himnaríki og skal engan undra. Við hefjum ferðina á því að aka til **Seefeld í Tíról**. Í Seefeld njótum við náttúrunnar milli hárra og tignarlegra fjalla. Við heimsækjum **Innsbruck**, höfuðstað Tíról, og komum við í **Mittenwald** í Þýskalandi þar sem við skoðum litlu myndskreyttu húsin en að koma þar er eins og að lenda í miðju ævintýri. Við höldum til Gardavatns en á leiðinni þangað verður stoppað hjá vínbónda þar sem við brögðum á afurðum hans. **Riva del Garda** tekur því næst á móti okkur við hið sægræna **Gardavatn** en bærinn stendur á fallegum stað við vatnið og er einn vinsælasti ferðamannastaður svæðisins. Í ferðinni munum við fara í áhugaverðar skoðunarferðir, yndislega siglingu á Gardavatni til bæjanna **Limone** og **Malcesine**, eiga ævintýralegan dag í **Feneyjum** og heimsækja **Veróna**, eina elstu borg Norður-Ítalíu.

10 dagar | 9 nætur

3 nætur Seefeld | 6 nætur Riva del Garda



24. september | Flug til München & Seefeld

Brottför frá Keflavík kl. 7:20. Mæting í Leifsstöð um 2,5 klst. fyrir brottför. Lending í München kl. 13:05 að staðartíma. Þaðan verður ekið til Seefeld í Austurríki þar sem við gistum næstu þrjár nætur.

25. september | Dagsferð til Mittenwald & Innsbruck

Á dagskránni í dag er heimsókn til bæjarins Mittenwald sem á sér engan líka en þar er að finna ótal lítill myndskreytt húsnæði, dásamlegan bæjarlæk og skemmtilegar verslanir. Bærinn er frægur fyrir smíði strengja- og plokkljóðfæra og stendur minnisvarði af Matthias Klotz, upphafsmanni fiðlusmíði í Mittenwald, fyrir utan fiðlusafn bæjarins. Við höldum svo áfram til Innsbruck, höfuðstaðar Tíról, sem er umvafinn mikilli fjalladýrð.



Innsbruck var ein af borgum Habsborgaranna, einnar valdamestu ættar Evrópu um aldir, og ber miðaldahluti borgarinnar þess greinilega merki. Blómatími Habsborgaranna var á 15. ld undir stjórn Maximilians I en hann lét byggja eitt helsta aðdráttarafi borgarinnar, húsið með gullþakinu, sem stendur við eitt fallegasta torgið í Tíról. Við höldum í stutta skoðunarferð um borgina en að henni lokinni verður hægt að kanna borgina á eigin vegum, líta inn til kaupmanna í Maria-Theresien-Straße eða setjast inn á kaffihús.

26. september | Frjáls dagur í Seefeld

Í dag tökum við það frekar rólega, hefjum daginn á staðgóðum morgunverði og höldum síðan í stutta skoðunarferð um Seefeld, sem er með eftirsóttustu ferðamannabæjum Tíróls. Bærinn er umkringdur þverhníptum fjöllum en áður fyrr var hér mikið vatnasvæði og ber nafn bæjarins það með sér. Eftir stutta göngu með fararstjóranum er frjáls tími það sem eftir lifir dags. Hér er margt hægt að gera, fara með hestvagni um bæinn, ganga hringinn í kringum vatnið eftir þægilegri gönguleið eða fara með kláfi upp í Rosshütte sem er í 1.784 m hæð. Þar er að finna gott veitingahús og er upplagt að fá sér kaffi og svo sem eina tertusneið.



27. september | Hádegissnarl hjá vínbónda, skómarkaður í Dro & Riva del Garda



Nú kveðjum við Austurríki og höldum að Gardavatni. Ekið verður yfir Brennerskarðið og leið okkar liggur til vínbónda og þar verður boðið upp á létt hádegissnarl áður en verður ekið áfram í gegn um Sarca dalinn í forna smábæinn Dro og lítum þar inn á einn stærsta skómarkað Norður-Ítalíu. Við komum til Riva del Garda við Gardavatn þar sem við munum gista í sex nætur á góðu hóteli.

28. september | Skoðunarferð í Riva del Garda & frjáls dagur

Dagurinn verður rólegur en að loknum morgunverði förum við fótgangandi í skoðunarferð um bæinn Riva del Garda. Að henni lokinni er frjáls tími til að skoða sig um í þessum snotra bæ, ganga litlar og þröngar götur hans, staldra við í verslunum, rölta undir pálmatrjám með fram ströndinni eða skondra upp að virkinu Bastillione þaðan sem er einstakt útsýni yfir vatnið. Einnig er kjörið að njóta aðstöðunnar á hótelinu, annaðhvort í sundlaugargarðinum eða í heilsulindinni.

29. september | Ævintýrlegur dagur í Feneyjum

Fyrir höndum er langur en stórskemmtilegur dagur. Við leggjum snemma af stað og ökum til Feneyja. Á rölti um borgina, með fram síkjum og yfir brýr, verður á vegi okkar allt það sem gerir Feneyjar að eftirsóttasta ferðamannastað álfunnar. Við Canal Grande gefur að líta einar 200 glæsilegar hallir og við Markúsartorgið stendur Markúsarkirkjan, ein merkilegasta kirkjubygging veraldar, sem byggð er í austrænum stíl og minnir helst á höllina úr ævintýrinu *Þúsund og ein nótt*. Síðdegis mun hverjum og einum gefast tími til þess að skoða þessa fallegu borg betur, njóta mannlífsins og jafnvel líta inn á söfn. Komið verður aftur á hótél undir kvöld.



30. september | Dagsferð til Veróna

Dagsferð til Veróna, elstu borgar Norður-Ítalíu, er einn hápunktur ferðarinnar. Veróna er borg menningar og lista en frægust er hún sem sögu svið leikrits Shakespeare um Rómeó og Júlíu. Farið verður í skoðunarferð um borgina og staldrað við helstu staði þessarar merku borgar. Þar má nefna þriðja stærsta hringleikahús veraldar, Arena, og Kryddtorgið en þar stendur fjöldi fagurra bygginga og minnisvarða. Miðbær borgarinnar eins og hann leggur sig er á skráður á heimsminjaskrá UNESCO og ekki að ástæðulausu.



1. október | Sigling, Limone & Malcesine

Farið verður í ljúfa siglingu á Gardavatni. Haldið til Limone, eins fallegasta bæjarins við vatnið og þar áð í dágóða stund. Þaðan verður siglt yfir sægrænt Gardavatnið til



Malcesine, sem er sögufrægur ferðamannabær við austurströnd vatnsins. Í Malcesine gefum við okkur góðan tíma, fáum okkur hressingu og skoðum okkur um í bænum. Áhugasamir geta farið með kláf upp á Monte Baldo, hæsta fjallið við Gardavatn, en þeir sem kjósa heldur að vera á jafnsléttu geta litið inn í mjög áhugaverðan gamlan kastala sem er að finna í bænum. Frá Malcesine verður siglt til baka til Riva.

2. október | Frjáls dagur í Riva del Garda

Nú er upplagt að nota tímann í slökun og rólegheitum á þessum ljúfa degi í Riva del Garda. Nota aðstöðuna við hótelið eða skoða sig betur um í þessum heillandi bæ. Einnig er hægt að fara í skemmtilega göngu með ströndinni til næsta bæjar, Torbole, sem er enn einn hrífandi bærinn við vatnið. Þeir hressustu geta gengið upp í Santa Barbara kapelluna sem er í 625 m hæð yfir bænum.



3. október | Heimferð frá Mílanó

Eftir indæla og skemmtilega ferð verður ekið til Mílanó. Brottför þaðan kl. 16:20 og landing í Keflavík kl. 18:35 að staðartíma.

Fararstjóri getur fært dagskrárliði á milli daga eftir þörfum þegar komið er á staðinn.



Verð

399.900 kr. á mann í tvíbýli | 42.100 kr. aukagjald fyrir einbýli.

Verð fyrir Studio herbergi á hótelinu í Seefeld 11.900 kr. á mann.

Innifalið

- ✓ Flug með Icelandair og flugvallarskattar.
- ✓ Gisting í 2ja manna herbergi með baði.
- ✓ Morgun- og kvöldverður allan tímann á hótelum.
- ✓ Vinsmökkun og hádegissnarl hjá vínbónda.
- ✓ Allar skoðunarferðir með rútu samkvæmt ferðalýsingu.
- ✓ Íslensk fararstjórn.

Ekki innifalið

- ✓ Aðgangseyrir inn á söfn, hallir og kirkjur.
- ✓ Kláfar eða stólalyftur upp á fjöll.
- ✓ Siglingar.
- ✓ Strætisvagnaferð inn í Veróna.
- ✓ Hádegisverðir.
- ✓ Þjóf fé.



Valfrjálst

- ✓ Sigling í Feneyjum u.þ.b. € 20.
- ✓ Sigling á Gardavatni u.þ.b. € 23.
- ✓ Kláfur frá Malcesine upp á Monte Baldo u.þ.b. € 26.
- ✓ Aðgangur að hringleikahúsinu í Veróna u.þ.b. € 18.
- ✓ Kláfur upp á Rosshütte u.þ.b. € 18.



Hótel

- ✓ Seefeld - Hotel Bergland
- ✓ Riva del Garda - Hotel Villa Niccoli.

Nánari upplýsingar

- ✓ Vert er að hafa í huga að þrátt fyrir að Bændaferðir séu alla jafna þægilegar rútuferðir er alltaf einhver ganga, t.d. í bæjarferðum. Margar evrópskar borgir eru bæði hæðóttar og ójafnar undir fæti og aðgengi að áfangastöðum þannig að leggja þarf rúttunni mislangt frá. Ef þú hefur einhverjar vangaveltur varðandi þetta vinsamlegast ekki hika við að hafa samband við skrifstofu Bændaferða.